


潞城考古錄



潞城攷古錄卷上

畿輔叢書

通州劉錫信撰

潞縣故城攷

土人呼曰古城

通州潞河東八里有古城周圍四里許遺址約高五尺東西北三面俱存惟南面近官道已成陸地西北隅廢堞獨高丈餘疑當日角樓瞭臺之類攷之州志曰相傳爲前朝駐兵處或云古潞縣疑不能明也歲在壬午土人於古城北得一石刻爲唐景城主簿彭君權殯誌銘予屢訪之不獲至癸巳歲始得焉

予有文跋其後詳記得石本末

誌云季弟長源迎神葬於古漁陽城北采貴里之原稱此城爲古漁陽城予初

潞城攷古錄卷上

疑之後讀水經注云鮑邱水南逕潞縣故城西王莽之通潞亭也漢光武遣吳漢耿弇等破銅馬五幡於潞東謂是縣也屈而東南流逕潞城南世祖拜彭寵爲漁陽太守治此寵叛光武遣游擊將軍鄧隆伐之軍於是水之南按鮑邱水卽潞河潞河過今州城東卽屈而東南流古城在潞河東與水經注所謂南逕潞縣故城西合余嘗尋訪其地登古城廢堞南望河去城約三里時當秋日漕艘未盡南下帆檣林立一一可辨蓋河至此折而東流正經古城之南與水經注所謂屈而東南流逕潞城南正合則古城爲漢潞縣故城無疑也潞水皆南流惟此地折而東流隆是

以得軍此水之南非親至其地不知也又按司馬彪五行志建武中彭寵被徵書至明日潞縣火災起城中飛出城外燔千餘家殺人時寵與幽州牧朱浮有隙疑浮見浸譖遂反叛攻浮卒誅滅卽此徵之亦可見潞縣爲太守治所寵初被徵而郡城災爲破滅之兆若潞仍如西漢時爲漁陽支縣遠在數百里外卽偶爾遇災豈得遂指爲太守滅徵志雖無明文可以互證也但司馬彪郡國志云縣名先書者郡所治也則漁陽郡當先書潞縣矣而郡國志漁陽郡仍以漁陽縣爲首或司馬彪悞沿班志舊文未及更正歟又考三國志公孫瓚旣害劉虞虞從事鮮于輔燕國閭

潞城攷古錄卷上

二

柔欲報公孫瓚與瓚所置漁陽太守鄒丹戰于潞北破之則終東漢之世漁陽郡俱治潞可知惟彭君墓誌未出土以前無憑指此城爲潞縣故城今由此石證以水經注五行志使二千年之古蹟粲然可攷并可補後漢書及地理諸家之闕金石之神益良多也

通潞亭攷

州志古蹟門載古城一條又別載通潞亭一條注云遺址莫攷不知通潞亭卽潞縣故城也水經注明言之矣蓋通潞非亭館之名亦非漢制十里一亭及後漢封爵亭侯之亭按漢書王莽改縣以亭名者三百六十以應符命文則

莽所謂亭卽縣也特異其名以應符命耳後人不察似莽
會建亭於潞別列之爲古蹟之一非其實矣方輿紀要之
誤與州志同

州城攷

唐文獻重修通州新城記云通州古漁陽地相傳勝國前
無城捍以籬塞其有城自洪武初忠敏侯孫興祖始又載
曰下

舊聞并州志城池門其說略同予以爲非也攷通州自漢

建爲潞縣班志作路後
漢書始从水其故城遺址在潞河東後漢書五

行志所云潞縣火災起城中當卽河東之故城矣徙治河

以西年代莫攷酈氏注鮑邱水謂逕潞縣故城西旣曰故

城知元魏中葉已移治他所矣近日州城南一里許土人

潞城攷古錄卷上

掘得唐長豐令李君墓誌云葬於縣之南三里知唐時潞

縣已治於此惟里數不符者疑唐城僅今城北一隅迨後

廣其南面耳今州署學宮皆在北門內此必歷代相沿者

自北門內至得石誌之地約有三里里數適符後唐明宗

時趙德鈞鎮幽州苦契丹抄略於州東五十里城潞縣而

戍之見通鑑蓋唐藩鎮城在今都城西至潞適五十里也疑

城之增廣卽在此時歟金海陵時升爲通州以潞附郭金

末元攻通州攸哈刺拔都一夕造砲三十雲梯數十附城

見元史本傳金將蒲察七斤以城降見元史太祖
紀張礎傳明之滅元也

徐達率諸將克長蘆直沽河西務至通州眾請攻城郭英

曰吾師遠來敵以逸待勞攻城非我利也英以千人伏道旁率精騎三千直抵城下克之見鴻猷錄明史紀事本末是通州歷代俱有城見之通鑑元史鴻猷錄明史紀事本末諸書班班可攷而此記及州志俱謂元以前無城何不攷之甚耶

漁陽郡三治潞

漁陽郡三治潞縣州志俱未載其東漢及宇文周并方輿紀要諸書亦未之載也東漢治潞見水經注前已詳言之矣隋書地理志涿郡潞縣下云舊置漁陽郡開皇初郡廢隋承周後周之漁陽郡治潞明矣攷周滅北齊僅四年卽禪於隋於齊之郡縣未必大有更置隋志不曰周置而曰

潞城攷古錄卷上

四

舊置或統承齊氏而言之也唐書地理志潞縣下云武德二年自無終徙漁陽郡於此置元州蓋隋漁陽郡治無終至此徙治潞縣也唐人州郡並稱如幽州范陽郡元州則漁陽郡也迨貞觀元年罷元州以潞隸幽州開元十八年又分置薊州亦號漁陽郡

州志屬范陽國之訛

通州志序沿革云晉屬范陽國按晉書地理志潞屬燕國州志誤魏書地形志漁陽郡潞縣下云晉屬燕國後屬所謂後屬者謂後仍屬漁陽郡魏志省文最多其在石趙慕容燕苻

秦之世歟

潞郡辨

清類天文分野之書載通州北魏時分置潞郡按魏書地形志無潞郡而潞縣隸漁陽郡方輿紀要云北齊時分置潞郡不知何據參攷隋志齊於潞縣置郡仍名漁陽不名潞郡也顧氏似沿清類天文分野之書又知魏志無潞郡遂稍變其時代耳

安樂故城攷

魏書地形志潞縣下云眞君七年并安樂縣太平寰宇記云安樂故城漢縣廢城在今潞縣西北州志云遺址莫攷按今州城西北二十里有安德鄉地名壩上通州稱曰北壩都人稱曰東壩卽鄭村壩也明設御馬苑於此其故城尙存疑安德鄉卽安樂故縣安德爲安樂之訛以音相近而誤耳明御馬苑或因安樂故城遺址增築今莫可攷矣

通州防禦使攷

金史地理志通州下云興定二年五月陞爲防禦按金宣宗貞祐二年南遷元史太祖紀十年金右副元帥蒲察七斤以通州降元太祖十年金貞祐三年也至興定二年通州入於元三載矣金人烏能復置防禦使耶興定疑誤金制設防禦使者爲防禦州刺史者爲刺史州自天德三年升潞縣爲通州乃刺史州耳至是置防禦使復升爲防

禦州

元史張礎傳通州降以伯達為通州節度判官按職官志無通州節度使元不置節度蓋是時元人初得金土庶事草創設官必暫沿金人之舊則金時通州曾置節度使而史失載此又因元史之文互見

潞縣治攷

潞縣舊治二漢時在潞河東八里之故城唐以後即治今州城俱證之近年所得唐石刻可以為據惟中間二三年未審治何所按水經注引魏氏土地記云潞縣城西三十里有潞河也以此計之元魏潞縣治所當在潞河東三

潞城攷古錄卷上

六

十里約略在通州三河交界之地今遺址絕無可攷古人數里數較小三十里在今僅二十餘里蓋是時尙未析三河縣元魏縣治在適中之地理或近之徙治潞河西雖年代莫攷疑當在齊周置漁陽郡之時今州城北門內十三級然燈佛塔穹窿高峻頗為巨觀建自周宇文氏當日建塔必在郡邑城市之地意潞縣必已徙治於此矣潞縣既治河西與縣東境遼遠唐初所以析置臨洺縣既省之後開元初復析置三河縣皆割潞之東境亦勢所必然也

潞縣四境攷

潞在漢時東西最闊至元魏北并平谷安樂二縣而南北

亦加寬廣矣唐析潞置三河縣而東境始狹今西境則三

閭房地名西即大興縣界距州僅二十里而緹按松漠紀聞

云潞縣三十里至交亭三十里至燕交亭必當日潞縣今通

州今大興蕪縣今大興交界地也今此村在大興縣境內距廣渠門

十餘里潞沙筆綴以高碑店為交亭非也知遼金時交亭以東皆潞縣境

矣又方輿紀要邊防攷二書載州境煙墩及官軍巡哨處

有大黃莊本名大王莊音相近而訛在三閭房西五里元張雨怯薛行云日晚偷出齊化門大王莊前行劫奪楊士奇南歸紀行錄云余至大王莊建安公遣子錫攜酒來迓即此是大黃莊明代尙屬

通州今屬大興矣州西境又析去數里也又遼史香河縣

本武清之孫村居民聚集因分武清潞縣置是州東南境

潞城攷古錄卷上

又析入香河也

漁陽攷附

漁陽郡自六國燕時已置秦因之見史記漢書地理志後

漢書郡國志魏書地形志俱載漁陽郡所領有漁陽縣即

秦與西漢郡治其故城在今密雲縣南境見太平寰宇記

方輿紀要諸書北齊後周二書無地志可攷隋書地理志

始無漁陽縣蓋廢於齊周之世矣隋志漁陽郡領縣一曰

無終無終自昔隸右北平元魏隸漁陽至隋移郡以治之

此無終始兼有漁陽之名也唐書地理志潞縣下云武德

二年自無終徙漁陽郡於此置元州領潞漁陽并置臨洺

縣貞觀元年州廢省臨洺無終此漁陽縣之名復見於唐
初者玉田縣下云本無終武德二年置貞觀元年省乾封
二年復置萬歲通天元年更名蓋徙漁陽郡治潞而廢故
漁陽郡爲漁陽縣又析其地而以故縣無終之名名之其
實無終漁陽皆無終地非秦漢之漁陽故地矣如山陰在
晉代本會稽郡治隋廢會稽郡爲縣并山陰諸縣入焉唐
初復析會稽縣地置山陰與此相同至開元十八年置薊
州治漁陽縣唐以後因之歷梁唐遼金元皆同明初省縣
入州歷年既久時代且近後代地理諸家不加詳攷皆習
見唐置之漁陽遂混爲秦漢之古漁陽通攷方輿紀

潞城攷古錄卷上

八

要及各地地理諸家書多以鮑邱水沽水載薊州漁陽縣下
而地勢水道始紊亂矣

太平御覽引圖經云薊州漁陽縣本北戎無終子國有無
終山城羅泌國名記無終子翟國今薊之玉田漁陽卽其
地觀二書知唐漁陽爲古無終地可爲確據又遼南忭盤

山在薊州上方感化寺碑略云感化者魏太和十九年無終

縣民田氏茲焉營辦此亦一證也

王應麟急就篇註云右北平郡秦置唐爲薊州

攷秦之右北平治無終

唐書地理志檀州密雲郡下云有威武軍萬歲通天元年
置本漁陽開元十九年更名知唐開元以前密雲尙以漁

陽名軍猶沿用漢以來故地名又密雲縣志云縣學在鼓樓東唐貞觀十二年漁陽刺史韋宏機創建亦仍稱漁陽也

鮑邱水攷

朱氏日下舊聞亦沿前代地理諸家之訛於通州既載太平寰宇記方輿紀要諸書以白河爲鮑邱水矣於薊州又載水經鮑邱水經文一條未免歧出水經云鮑邱水從塞外來南過漁陽縣東又南過潞縣西又南至雍奴縣北屈東入於海按漢潞縣今爲通州薊州在通州東一百四十二里中隔三河縣若以薊州爲古漁陽則此河出薊州之東

潞城攷古錄卷上

九

烏能返過通州之西地勢睽隔有不能強通者況水經明言南過漁陽縣東又南過潞縣西則漢時潞在漁陽之南非東西相距也薊州治所之漁陽乃唐所建非秦漢漁陽故地鮑邱水卽潞河一名白河白河自塞外流入密雲縣境南逕順義又南至通州酈注云鮑邱水東南逕漁陽郡治秦始皇二十二年置方輿紀要於密雲縣載漁陽城在縣南十八里秦郡治此據二書則水經所謂南過漁陽縣東者指此通州潞河東有古城爲潞縣故城與水經所謂又南過潞縣西合酈注亦云鮑邱水又南逕潞縣故城西屈而東南流逕潞城南今潞河過州東卽轉而東南流正

經古縣城之南與經注俱屬相符則潞河爲古鮑邱水無疑又潞河自通州南流入武清縣境南會衛河入海武清爲古雍奴縣與水經又南至雍奴縣北屈東入於海亦合與薊州俱無涉

薊運河辨 附

方輿紀要旣以通州白河爲鮑邱水又以薊州城南之運河爲鮑邱水又稱爲潞水通州白河名潞河者以州爲古潞縣鮑邱水逕潞縣故稱潞水見之水經本文及酈注甚明今薊運河全不逕由潞縣豈有名潞水之理又因班志漁陽縣載沽水水經注有沽水逕漁陽縣故城西之文復

潞城攷古錄卷上

十

旨以沽河之名

詢之薊人云并無此稱

總緣著書家概以唐置之漁

陽爲漢漁陽而未嘗核其地勢之東西南北也

沽水合鮑邱水攷

水經元文沽水鮑邱水列爲二水各有源流酈氏注鮑邱水云鮑邱水又西南流注之於沽河亂流而南又云鮑邱水入潞通得鮑邱之稱矣其注沽水云沽水又南逕安樂故城東俗謂之西潞水也又云沽水又南濕餘水注之沽水又南左會鮑邱水世所謂東潞也沽水又南逕潞縣是以沽水爲西潞水而云左會鮑邱水世所謂東潞指鮑邱水爲東潞水也云左會則鮑邱水明在東沽水明在西矣

至潞合流也今通州白河自東北來富河自西北來至州城東北合流爲潞河以水經注及今地勢攷之白河爲古鮑邱水富河當爲古沽水富沽或音相近而訛耳況所云沽水又南濕餘水注之濕餘水卽今昌平榆河下流爲沙河入於富河合攷之益見富河爲沽水之證乃地理諸書但知白河爲鮑邱水而不及富河太平寰宇記以爲潞河一名沽河一名鮑邱水似一河有二名實乃兩河會於一也其云北自檀州密雲縣界流入亦專指白河上源耳

州志富河之訛

州志富河在州城北源出甕山自白羊口經榆河下流爲

潞城攷古錄卷上

十一

沙河由順義縣南界流至州城東北與白河會焉攷甕山在宛平縣境內白羊口遠在昌平西四十里關隘之地若源出甕山何以返經白羊口蓋甕山乃通惠河上源經由之地州志復指爲富河之源似屬牽混長安客話云自塞外西流入白羊口經榆河下流沙河由順義南界至通州城東北入白河卽通州富河也較州志頗明確榆河爲古濕餘水以水經注攷之富河疑卽古沽水水經注謂濕餘水注於沽水今富河會榆河下流其說相合

州志潞河之誤

州志潞河一條舍水經注鮑邱水本文及太平寰宇記方

輿紀要所載白河諸說俱不引而沿吳道南河渠志及漕河攷之訛謂白河發源於霧靈山霧靈山乃潮河經由之地昌平山水記云潮河經密雲懷柔至牛欄山與白河合水道提綱云潮河經密雲縣城東又西白河自北來會二說雖微異總之潮河白河各有源流後乃會於一耳不可以潮河上源混爲白河上源也

州志鮑邱河之誤

明一統志云鮑邱河源自禦夷北塞南流逕九莊嶺逕密雲戍又南左合道人溪水至通州米莊村合沽水經三河縣界入洵河方輿紀要於三河縣載鮑邱河白河之別名

潞城攷古錄卷上

三

也自密雲縣流經通州東境米莊村又流經縣界至寶坻縣界合於洵河按陳昶三河志云鮑邱河白河之分流也明一統志似不知白河與鮑邱河爲二水上文則摭拾水經注鮑邱水之文下文又非水道核實經行之地全屬訛舛方輿紀要皆傳寫之本文字閒有異同曾見一本作白河別流也與三河陳志同志又云鮑邱河自順義縣田各莊入境至始管營始有河形由夏店東石橋下至葛中馬房寶坻縣界平時乾涸閒有水路每遇霖雨聚水歸河旋發旋消蓋古鮑邱水卽今白河其支流入三河境稱鮑邱河是支流尙沿古名耳白河爲北直一大川今爲北運河

鮑邱河據縣志則涓滴細流耳其爲支河無疑通州志山川門潞河外別載鮑邱河一條襲用明一統志之文而不知其訛想因經通州米莊村一語故誤載耳三河陳志所記水道頗爲詳核可以證明一統志及方輿紀要之誤此河旣自順義流入三河絕不經由通州與通無涉

高粱水攷

水經注云鮑邱水入潞高粱水注之首受濕水於戾陵堰自堰枝分東逕梁山南又東北逕劉靖碑北又東南流逕薊縣北又東至潞縣注於鮑邱之水今都城西直門外池北半里許有高粱河源發西山玉泉東入都城西水門稍

潞城攷古錄卷上

三

東流入 大內環繞 宮殿南出玉河橋水門東行會南北城河由大通橋東下經慶豐閘平津上下閘普濟閘東至通州入白河元世祖至元二十九年郭守敬開此河置閘蓄水通舟以濟漕運賜名通惠參取長安客話 蓋此河在西直門外今仍稱高粱河入都城 大內則稱玉河流

出東便門外大通橋下或稱大通河由五閘池運而下至通州則稱通惠河土人呼曰裏河本一河而隨地異名是今通惠河卽古高粱水也白河爲古鮑邱水據水經注高粱水至潞縣注於鮑邱水據通惠河下流入白河與酈注合攷之前代魏劉靖見水經注北齊斛律羨見齊書本傳皆導高粱

水會潞灌田者又桂文襄公奏議亦云此河元郭守敬由古水道開濬非自守敬創始可知守敬卽因高粱水入潞故道廣爲開濬上源多引白浮神山玉泉諸水下流因地勢建閘蓄水以成河耳今人習焉不察皆知爲通惠河而不攷其卽古高粱水也

通州長城攷

州城西北四里有古長城遺址迤北接連順義南近通惠河北岸而止逾河而南復閒存一段又變而東西橫互再南爲州西門外入都孔道攷其形勢長城本綿連南北似挑通惠河及修西門外通京石路掘斷者詢之村人亦云又唐李

潞城攷古錄卷上

古

丕墓誌石得之城南其銘曰屹然孤墳長城之東可見長城自北綿互而南唐時城西南遺址尙存也攷之州志曰秦蒙恬所築殊爲傳會按昌平山水記順義縣西南三十里有葦溝村村東臨温餘河渡渡南有長城遺蹟遼史順州南有齊長城齊天保中所築沈括曰幽州東北三十里有望京館東行稍北十餘里出古長城卽此今通州長城迤北接連順義則卽北齊天保中所築之長城矣
潮縣武清二志俱載有古長城疑昔時亦與此接連爲一云

潞沙辨

許亢宗奉使行程路云潞河東半里許有潞沙曹操征烏丸袁尙等鑿渠自滹沱由派水入潞沙按三國志烏丸破幽州公將征之鑿渠自滹沱入派水名平鹵渠又從洵河口鑿入潞河名泉州渠據志則操所鑿乃二渠許混爲一渠又因潞河東有沙遂訛河爲沙皆未詳攷國志也龔翔麟以潞沙筆綴名書殊失攷矣

石羅漢年代攷

州城南地名王恕園有漢漢壽亭侯廟門內有井近日土人淘井得石羅漢焉今安奉寺中羅漢身下連石座座刻路縣住人李從善舍辦羅漢一尊後刻口口八年四月八

潞城攷古錄卷上

七

日惜年號上一字全磨滅下一字僅存下半爲女字攷歷代紀元下一字下截从女者皆安字前代有茲土以安建元者後漢有漢安建安西晉有泰安永安北魏有興安太安天安永安遼有大安金有承安大安其餘安字紀元皆分帝南方非其土字也又攷漢魏及南北朝碑誌多用八分卽楷書亦帶分勢此文皆今體非漢晉元魏明矣金承安止五年大安止三年惟遼道宗大安十年此石刻於八年爲遼大安無疑也石刻路字不从水與遼史不合然班固漢志路不从水此刻或從漢志未可知也李從善與南唐中主子封韓王者同姓名時代先後不同當別爲一人

矣從善不書官蓋邑之富民也遼人崇尙浮屠國人化之刻羅漢崇奉以祈福祥耳其習尙然也

甘棠鄉攷

通州東十五里有甘棠鄉十六國春秋慕容雋觀兵近郊見甘棠於道周從者不識雋曰此詩所謂甘棠於是內外臣僚並上甘棠頌又名勝志通州志並云將臺有三其一在州城北通京師東直門中路舊傳慕容氏拜將臺也攷慕容氏是時都燕潞距燕城僅數十里地屬近郊而州又有將臺遺蹟鄉之得名或以此歟

太子府攷

潞城攷古錄卷上

六

通州東南四十里有村名太子府

今分前二村

州西二十二里

有村名大王莊

莊已見前今屬大興爲入都齊化門經由之地

攷金史胥持國傳

上書者言民間冒占官地如太子務大王莊非私家所宜有持國言此地自異代已爲民有不可取也務與府音相近每多互訛

如州志牛家務土人呼曰牛家府州志及燕山叢錄載灤縣有得仁務錢塘遺事作德仁

府則二村得名當自遼代始矣

通州自遼迄今爲畿甸近地州城距京僅四十里而西境則與京縣壤地相錯其去都門二十餘里耳自遼金元明王公勳戚食邑賜田所在多有諒不僅太子府大王莊也惜故籍無存遂多湮沒今城南迤西

距城一里

有王恕園相傳

爲明三原王端毅公別業今其地爲漢前將軍廟每歲五月香火極盛廟中陳列諸肆遊人絡繹彌月始罷壩上則楊文貞公賜田見之於東里集又攷州乘有咸甯侯莊州西十二里莊有狐土塔千戶營州西十八百戶州東南三十人訛曰咸狐莊百戶名之州西南喇嘛莊州東十高麗莊州南十上一字州南十高麗屯命名之始俱不可攷矣咸甯侯爲仇鸞封號鸞嘉靖中會統兵禦敵於通或卽其賜莊抑前代別有一咸甯歟

樂山神攷

魏書地理志潞縣下云有樂山神今遍訪州境無所謂樂潞城攷古錄卷上

七

山者而三河縣志有駱山攷三河唐開元中析潞縣地置則元魏時三河尙在潞縣管內樂與駱同音古多通用

金石遺文

通州古金石之文絕少所存碑版皆明代物自元以前頗爲罕覩吳草廬通州文廟重修碑載集中久已片石無存矣蓋自遼金元之亡及明成祖與南軍構兵暨正統己巳嘉靖庚戌逮崇禎之世此地遭兵燹獨甚是以古物無存余留心搜訪於州城南得唐長豐令李君墓誌貞元閒物又於古城北得唐景城主簿彭君權殯志建中年物余俱有文記其事詳識顛末二石擬嵌之學宮壁閒又聞里二

寺田氏得石刻於田中文皆隸書屢託人索之伊堅不與竟投諸河可憾也州城南舊營房訪有尊聖陀羅尼石幢出土不盈尺大半尙沒土中逼近民居甲午歲屢欲致之爲勢所阻今此物亦失矣好之而無力雖近且易有不能致之六一所以致歎也

補州職官

州志職官表祇詳載明洪武以後金元二代厘存六人遼以前無之文獻無徵可慨也予於所得金石遺文并史册各家詩文集得唐代二人金代三人元代五人詳錄於左

潞城攷古錄卷上

六

李丕初爲潞縣丞

王諫爲幽州潞縣尉撰彭浼墓誌者

右唐二人見石刻

王寂字元老玉田人金天德三年進士官至中都路轉運使諡文肅所著有拙軒集集中祁縣重修延祥觀記作於大定十九年結銜書朝請大夫通州刺史兼知軍事

康元弼雲中人大定末以秘書少監兼著作郎改通州刺

史兼領漕事

本傳

通州刺史史肅

見孫鐸傳

右金三人一見本傳二見金史

學正楊齊賢

州長速朗吉大

州之參李也先

按吳文正公重修文廟碑云永平楊齊

賢來為通州學正州之參李侯與州之長協心主張於上

又云州長名速朗吉大其官承直李侯名也先其官承事

云云皆但稱其散官而不書其職事官後閱三河縣志載

元文廟加封詔書碑後書承直郎大都路通州達魯花赤

兼管內奧魯勸農事速朗吉大知速朗吉大為通州達魯

花赤也

右元三人見吳文正公集通州文廟重修碑

潞城攷古錄卷上

五

馬世顯知通州事

右元一人見馬祖常石田集禮部尙書馬公神道碑

詳卷中

劉顯至正末為通州安撫司副使

右元一人見朱竹垞曝書亭集中

詳卷中

後漢漁陽太守攷

余既攷東漢漁陽郡治潞則後漢書各傳中所載漁陽太

守當別立一表載之志中今詳列於左

彭寵

本傳更始立使謁者韓鴻徇北州承制得專拜二千石以下即拜寵偏將軍行漁陽太守事及光武至薊以書招寵寵乃發步騎三千人與上谷軍合而南光武承制封寵建忠侯賜號大將軍寵轉糧食前後不

絕是時北州破散而漁陽差完有舊鹽鐵官寵以質穀積珍寶益富強

郭伋

本傳彭寵滅轉為漁陽太守漁陽既離王莽之亂重

戮渠帥盜賊消散時匈奴數掠郡界邊境苦之伋整勒士馬設攻守之略匈奴畏憚遠迹不敢復入塞民得安業在職五

陳訢

王霸傳詔霸與漁陽太守陳訢為諸軍鋒建武十年

張堪

本傳拜漁陽太守捕擊姦猾賞罰必信吏民皆樂為用匈奴嘗以萬騎入漁陽堪率數千騎奮擊大破之

郡界以靜乃於狐奴開稻田入千餘頃勸民耕種以致殷富百姓歌曰桑無附枝麥穗兩歧張君為政樂不可支視事八年

范遷

為漁陽太守以智略安邊匈奴不敢入界見郭丹傳

王暢

本傳轉漁陽太守所在以嚴明為稱

潞城攷古錄卷上

張顯

鮮卑傳延平元年鮮卑復寇漁陽漁陽太守張顯率數百人出塞追之兵馬掾嚴授力戰而死顯中流矢

主簿衛福功曹徐咸俱歿於陣

李膺

本傳遷漁陽太守

又禰衡為漁陽三搥在後漢末亦當屬治潞之漁陽也

補州人物

州志人物亦祇詳明正統以後金元則採之二史遼以前無之然明代雖詳仍有明史有傳而志不載者施聚閻應元是也又攷唐書藩鎮傳吳少誠幽州潞人志亦未經採入又讀楊東里續集載督河員外郭誠北京通州人官民

皆譽其廉公剛正楊公與談頗久稱其所論皆當云云志
僅存其名不載其行事史又不爲立傳僅從南歸紀行錄
見之東里負人倫鑒非漫許可者以上諸人俱當補入人
物志明史列傳中金忠應入通州流寓而志不載又明胡
應麟少室山房集寓潞之詩極夥詩悉採入下卷知其攜家居通
頗久志亦未及此二人當入州志流寓

朱竹垞寓潞攷

朱竹垞曝書亭集昭陽赤奮若年龔尙書輓詩有別袂何
曾把之句自注時余赴通州闕逢攝提格年送龔大之淮
揚詩云潞河遲日送征驂禁雪初晴柳尙含一路青山到

潞城攷古錄卷上

三

淮浦照人明月已江南又鴛鴦湖權歌序云甲寅歲暮旅
食潞河言歸未遂爰憶土風成絕句百首旃蒙單闕年有
潞河遙送湯駟南還詩載卷下柔兆執徐年讀葉司成嵩遊
草有客居通潞冬復春之句則自癸丑迄丙辰皆竹垞寓
潞之歲也其柳巷杏花歌則旃蒙赤奮若年詩乃罷官後
再遊通州宋牧仲署中旋京途中之作柳巷在州西十五
里爲入都東便門經由之地但竹垞寓潞集中不言所主
誰氏後讀葉訥菴讀書齋偶存稿有宿通州水月菴故人
朱錫鬯客龔使君所詩載卷下攷竹垞交契者有龔翔麟官
部曹遷御史疑龔以郎官奉差坐糧通州竹垞館其行署

駐通部使者州志無表遂難稽云 國朝詩別裁集載徐
蘭字芬若一字芝仙江南常熟人流寓北通州以終著有
出塞詩長白描人物詩無一語不奇康熙閒人攷廡青山人行
狀山人與芝仙善但狀作於越徐芝仙里貫互異因攷流
寓故類及之

封爵攷

郡邑前代有封爵者志乘中當編列一表而州志缺焉余
稽之史傳編列如左

安樂公劉禪

見三國志及水經注

安樂侯高閻

見魏書本傳

潞城攷古錄卷上

三

潞縣侯孫家

見魏書靈徵志

潞陽郡公李廷

見元揭文安公集

古通州

今通州有二北通州隸京師順天府建自金天德中南通
州隸江蘇建自周世宗平淮時唐俱未以通州稱也唐通
州隸山南西道見唐志今四川之達州見一統志劉晏李實元稹
俱曾貶此州微之詩通州海內栖惶地樂天詩來書子細
說通州及幾助笑歌嘲阿輓那知傳誦到通州皆指此惟
北齊書斛律羨傳除通州刺史不知齊通州治何地齊書
無志隋書地理志兼記前代亦未之及俟攷

州縣同名凡記人邑里者當以省分或府冠之此史例也否則易於混淆矣嘗見浙江通志職官表中明巡按御史黃廷聘巡鹽御史袁九臯右布政使馬坤右參政錢嘯俱書通州人國朝温州府知府楊士烜書通州舉人攷州志俱無其名或係江南通州亦未可知又載元蔡心傳東陽人辟授通州判官亦未明著南與北也但楊士烜與州志科貢表中進士御史楊士斌進士沂水知縣楊士烜名類昆仲恐是州志漏略姑記之俟攷

州志濬縣人物之訛附

濬縣自順治中廢入通州州志兼載濬邑人物有後漢泉州人陽球曹魏雍奴人田豫元魏雍奴人高閭按二漢及

潞城攷古錄卷上

三

晉雍奴泉州各自爲縣見漢書地理志後漢書郡國志晉書地理志至北魏太平眞君七年并泉州入雍奴見魏書地理志唐天寶初雍奴更名武清見新唐書地理志今濬縣僅泉州故地一隅以前代泉州人屬濬尙可因泉州并入雍奴遂以雍奴人亦屬濬殊失限斷況田豫爲三國時人時泉州尙未并入雍奴則豫自爲雍奴人又攷魏書高閭傳眞君九年徵爲中書博士是時泉州并入雍奴僅二載耳閭若本泉州人隨邑遷改傳未有不載者可知閭自爲雍奴人俱與泉州無涉濬縣志雜採史傳未能詳攷地

理沿革州志遂沿其誤耳

補灤縣職官 附

金史蒲察思忠傳思忠本名畏也大定二十五年登第調
文德灤陰主簿志未載當補 縣在遼金本名灤陰

灤縣棗林辨 附

方輿紀要灤縣下載棗林在縣西北元致和元年上都兵
破通州燕帖木兒與戰于檀子山之棗林敗之按元史遼
東軍破通州燕帖木兒引兵擊之皆渡潞水走史明言戰
薊州之檀子山又云戰于檀子山之棗林薊州爲遼東孔
道遼東軍敗燕帖木兒追戰於此灤縣在通州南遼東軍
未嘗至其地以遼東軍爲上都兵方輿紀要已誤又以薊
之棗林爲灤之棗林益誤矣灤縣亦無檀子山

潞城攷古錄卷上

三

補遺

温榆河攷

昌平山水記温餘河卽昌平之榆河下流爲沙河入順義西南界下至通州入潞河本水經注之濕餘水以字相似而訛也 方輿紀要榆河一名濕餘河或名温榆河蓋濕餘之訛也 朱竹垞曰後漢書王霸爲上谷太守陳委輸可從温水漕以省陸轉輸之勞事皆施行章懷太子注引水經注作温餘水遼史順州有温餘河金更懷柔縣爲温陽豈盡無據水經注旣無善本今人習見坊刻遂指温字爲濕字之訛正恐類昔人所云以不悖爲悖也 案今沿

潞城攷古錄卷上

三

河居人仍呼此河上流爲温榆河益徵朱氏攷據之精當但水經注濕餘水注于沽水今富河沽水又南左會鮑邱水今白河是温榆河入富河富河始與白河合流也今挑濬此河一切文移章奏統稱爲温榆河而富河之名遂隱而不舉攷水道者亦不可不知也

潞城攷古錄卷下

通州劉錫信撰

史事

已載朱氏日下舊聞二十六七卷及通州吳黃二志者概不再錄州志與史事小有異同者仍錄正

史明史應擡寫者

悉遵原書款式

後漢書耿弇傳光武還薊復遣弇與十三將軍追賊至潞東及平谷再戰遂窮追於右北平無終土垠之間至浚靡而還

後漢書光武帝本紀建武二年遣遊擊將軍鄧隆救朱浮與彭寵戰於潞隆軍敗績

後漢書彭寵傳彭寵攻朱浮於薊帝使遊擊將軍鄧隆救

潞城攷古錄卷下

薊隆軍潞南浮軍雍奴遣吏奏狀帝讀檄怒謂使吏曰營相去百里其勢豈可得相及比若還北軍必敗矣寵果盛兵臨河以拒隆又別發輕騎三千襲其後大破隆軍浮遠遂不能救引而去

三國志魏武帝紀漢建安十年故安趙犢霍奴等殺幽州刺史涿郡太守三郡烏丸攻鮮于輔於犢平秋八月公征之斬犢等乃渡潞河救犢平烏丸奔走出塞

三國志魏武帝紀烏丸承天下亂破幽州略漢民合十萬戶遼西單于蹋頓尤彊公將征之鑿渠自呼淹入派水名平鹵渠又從洵河口鑿入潞河名泉州渠以通海

水經注至景元三年辛酉詔書以民食轉廣陸費不贍遣
謁者樊晨更制水門限田千頃刻地四千三百一十六頃
出給郡縣改定田五千三十頃水流乘車箱渠自薊西北
逕昌平東盡漁陽潞縣凡所潤合四五百里所灌田萬有
餘頃此魏使持節都督河北道諸軍事劉靖高
梁河開車箱渠立過碑今節錄一小段
北齊書斛律羨傳轉使持節都督幽安平南北營東燕六
州軍事幽州刺史導高梁水北合易京東會於潞因以灌
田邊儲歲積轉漕用省公私獲利焉

唐書地理志幽州范陽郡有府十四曰呂平涿城德平潞
城樂上清化洪源良鄉開福政和停驂柘河良杜咸甯此

潞城攷古錄卷下

二

府兵也

唐書契丹傳孫萬榮銳甚鼓而南殘瀛州屬縣恣肆無所
憚於是神兵總管楊元基率奚軍掩其尾契丹大敗獲何
阿小降別將李楷固駱務整收杖械如積萬榮委軍走殘
隊復合與奚搏奚四面攻乃大潰萬榮左馳張九節爲三
伏伺之萬榮窮與家奴輕騎走潞河東憊甚臥林下奴斬
其首九節傳之東都餘眾潰攸宜凱而還后喜爲赦天下
改元爲神功

河洛春秋史朝義東投廣陽郡不受北取潞縣漁陽擬投
兩蕃至渝關懷仙使使招回卻至漁陽過從潞縣至幽州

城東阿漣門外於醫巫閭神廟中被絞縊死

續通鑑綱目幹離不自平州破檀薊至三河蔡靖遣郭藥師及張令徽劉舜仁帥師四萬五千迎戰於白河兵敗而還藥師遂帥所部兵劫靖及都轉運使呂頤浩以降於是燕山府所州縣皆爲金有

按東都事略作戰於潞縣攷白河在潞縣境內

遼史太祖本紀神冊六年十一月下古北口分兵略檀順安遠三河良鄉望都潞滿城遂城等十餘城俘其民徙內地

遼史地理志臨潢府潞縣本幽州潞縣民天贊元年太祖

潞城攷古錄卷下

三

破薊州掠潞縣民布於京東與渤海人雜處隸崇德宮戶三千

金史世宗本紀大定改元十一月乙卯次三河縣左副元帥完顏穀英來朝丙辰次通州延安尹唐括德溫來朝丁巳至中都

金史穀英傳大定元年十一月穀英以軍至中都同知留守璋請至府議事穀英疑璋有謀乃陽許諾排節仗若將往者遂帥騎從出施仁門駐兵通州見世宗於三河

元史太祖本紀十年春正月金右副元帥蒲察七斤以通州降以七斤爲元帥

元史張礎傳張礎字可用其先渤海人金末曾祖琛徙燕之通州祖伯達從忽都忽那顏略地燕薊金守其蒲察斤以城降忽都忽那顏承制以伯達爲通州節度判官遂知通州父範爲眞定勸農官因家焉

按其蒲察斤據太祖本紀作蒲察七斤此傳誤

元史攸哈刺拔都傳攸哈刺拔都從木華黎攻通州獻計一夕造礮三十雲梯數十附城州將懼出寶貨以降

元史文宗本紀天歷元年十月燕帖木兒引兵至通州擊遼東軍敗之皆渡潞水走庚寅我師與遼東軍夾潞水而陣遼東軍宵遁我師渡而襲之燕帖木兒以通州知州趙

潞城攷古錄卷下

四

義能禦敵賜幣二匹

元史燕帖木兒傳丁亥禿滿迭兒及諸王也先帖不兒軍陷通州將襲京師燕帖木兒急引軍還十月己丑朔日將昏至通州乘其初至擊之敵軍狼狽走渡潞河庚寅夾河爲軍敵列植黍稽衣以氈衣然火爲疑兵夜遁辛卯率師渡河追之癸巳駐檀子山之棗林也速帖木兒禿滿迭兒合陽翟王太平國王朵羅台平章塔海軍來鬪士皆殊死戰至晚唐其勢陷陣殺太平死者蔽野餘兵宵潰已而撒敦將輕騎要之弗及而還

按也先帖不兒據馬祖常石田集作也先帖木兒

明史曹良臣傳曹良臣從大軍取元都還守通州時大兵出山西通州守備單弱所部不滿千人元丞相也速將萬騎營白河良臣曰吾兵少不可與戰彼眾雖多亡國之餘敗氣不振當以計走之乃密遣指揮仵勇等於瀕河舟中多立赤幟互三十餘里鉦鼓聲相聞也速大駭遁去良臣出精銳逐北百餘里元兵自是不敢窺北平

按仵勇明史紀事本末作許勇

明史常遇春傳元將也速攻通州詔遇春還備

按明史紀事本末作也速復侵通州

明史藍玉傳以征虜左副將軍從大將軍馮勝征納哈出

潞城攷古錄卷下

五

次通州聞元兵有屯慶州者玉乘大雪帥輕騎襲破之

明史紀事本末洪武二十年正月命宋國公馮勝等率師北征納哈出上諭勝等曰納哈出詭詐未易得其虛實爾等且駐師通州遣人覘其出沒彼若在慶州宜以輕騎掩其不備必可擒矣二月馮勝等兵至通州遣邏騎出松亭

關

明史孫巖傳燕師起通州守將房勝以城降王以巖宿將使與勝協守南軍至攻城甚急樓堞皆毀巖勝多方捍禦已復突門力戰追奔至張家灣獲餉舟三百

明史成祖本紀建文元年十一月庚午王次孤山邏騎還

報曰白河流澌不可渡王禱於神至則冰合乃濟師景隆遣都督陳暉偵敵道左出王軍後王分軍還擊之暉眾爭渡河冰忽解溺死無筭辛未與景隆戰於鄭村壩王以精騎先破其七營諸將繼至景隆大敗奔還

明史徐忠傳李景隆攻北平燕師自大甯還救至會州置五軍忠號驍勇使將前軍遂敗陳暉於白河破景隆於鄭村壩

明史成祖本紀建文二年九月盛庸代李景隆將復取德州吳傑平安徐凱相掎角以困北平時徐凱方城滄州王祥出兵攻遼東至通州循河而南渡直沽晝夜兼行冬十

潞城攷古錄卷下

六

月戊午襲徐凱破其城

明史紀事本末乃下令軍士循河而南軍士疑曰征東何南也王曰

夜有白氣二道自東北指西南占曰利南乃自直沽一晝夜疾行三百里至滄州

明史紀事本末建文四年正月平安遣兵復通州朱能擊之斬首七百餘級生擒部將賈榮等

明史紀事本末道衍薦鄆人袁珙相術燕王使召之至今使者與飲於酒肆王服衛士服偕衛士九人入肆沽珙趨拜燕王前曰殿下何自輕如此燕王陽不省曰吾輩皆護衛校士也珙不對乃召入詳叩之珙稽首曰殿下異日太平天子也燕王恐人疑乃佯以罪遣之行至通州既登舟密召入邸

明史金忠傳金忠鄞人少讀書善易卜兄戍通州亡忠補
戍貧不能行相者袁珙資之既至編卒伍賣卜北平市多
中市人傳以爲神僧道衍稱於成祖成祖將起兵託疾召
忠卜得鑄印乘軒之卦曰此象貴不可言自是出入燕府
忠常以所占勸舉大事成祖深信之燕兵起自署官屬授
忠王府紀善守通州南兵數攻城不克已召置左右有疑
輒問術益驗且時進謀畫遂拜右長史贊戎務爲謀臣矣
成祖稱帝論佐命功擢工部右侍郎贊世子守北京尋召
還進兵部尙書

明史景帝本紀正統十四年秋八月丙寅移通州糧入京

潞城攷古錄卷下

七

師

明史武宗本紀正德十五年冬十月庚戌次通州十一月
庚申治交通宸濠者罪執吏部尙書陸完赴行在十二月
己丑宸濠伏誅甲午還京師

明史倖佞傳帝至通州江彬尙欲勸帝幸宣府矯旨召勳
戚大臣議宸濠獄

明史楊廷和傳帝歸駐蹕通州廷和等舉故事請帝還大
內御殿受俘然後正宸濠等誅而帝已不豫趣召廷和等
至通州受事卽行在執宸濠等戮之駕乃還

明史獻皇后傳妃至通州聞攷孝宗恚曰安得以吾子爲

他人子留不進帝泣涕願避位羣臣以慈壽太后命改稱興獻后乃入

明史倖倭傳邵元節還朝舟至潞河命中官迎入賜蟒衣及闡教輔國玉印

太常續攷嘉靖十八年五月十七日獻皇后梓宮行至通州奠獻使行上食禮訖退題主畢命官行降神禮皇帝遣致祭於潞河之神

明史夏言傳嘉靖二十七年正月盡奪言官階以尙書致仕猶無意殺之也會有蜚語聞禁中謂言去時怨謗嵩復代仇鸞草奏訐言納銑金交關爲姦利事連蘇綱遂下銑

潞城攷古錄卷下

八

綱詔獄嵩與元炳謀坐銑交結近侍律斬綱戍邊遣官校逮言言抵通州聞銑所坐大驚墜車曰噫吾死矣再疏訟冤帝不省

明史世宗本紀嘉靖二十九年秋八月丁丑俺荅大舉入寇攻古北口薊鎮兵潰戊寅掠通州駐白河分掠畿甸州縣京師戒嚴

明史王忬傳忬遷御史按順天嘉靖二十九年俺荅大舉犯古北口忬奏言潮河川有徑道一日夜可達通州因疾馳至通爲守禦計盡徙舟楫之在東岸者夜半寇果大至不得渡遂壁於河東帝密遣中使覘軍見忬方厲士乘城

還奏帝大喜副都御史王儀守通州御史姜廷頤劾其不職忬亦言儀縱士卒虐大同軍大同軍者仇鸞兵也帝立命逮儀而超擢忬僉都御史代之寇退忬請賑難民築京師外郭修通州城築張家灣大小二堡置沿河敵臺皆報可尋罷通州易州守禦大臣召忬還

明史紀事本末嘉靖二十九年八月俺答帥部下至古北口長驅入內地巡按順天御史王忬聞報度兵弱無能禦者夜草疏言敵兵慄悍若風雨而古北口距京師僅七舍請速集廷臣議戰守策而身出駐通州召吏民給仗聽約束收漕舟艤潞河西勿使爲敵用甫畢而夜半敵兵果至

潞城攷古錄卷下

九

營河東二十里孤山汝口諸處忬復爲疏繼城使之來京師請援檄召諸鎮兵勤王時寇騎逼通州數日前阻水未能渡王忬日夜乘城守不能支連告急詔遣副都御史王儀往援咸甯侯仇鸞得勤王檄以大同兵二萬入援與副總兵徐珏遊擊張騰等率兵馳至陳通州河西時保定都御史楊守謙以五千騎至延綏副將朱楫以三千騎至人心稍安已而河閒宣府山西遼陽諸將各以兵先後至俺答兵自白河東渡潞水西北行掠村落居民焚燒廬舍火日夜不絕仇鸞率勤王諸兵不敢擊逮繫鎮守通州都御史王儀詣京卽訊已而儀至下獄以畏懦不戰削籍去初

儀至通州命營兵屯戍城外而身閉閣臥城中會仇鸞引兵至敵少卻鸞兵往掠食諸村落儀發兵捕執下獄死者十數人鸞兵大譁欲甘心儀時巡厥御史上其狀帝怒故逮治之尋以巡按御史王忬爲僉都御史代儀守通州明史楊選傳嘉靖四十年十月丁卯辛愛與把都兒等大舉自牆子嶺磨刀峪潰牆入犯京師戒嚴帝大驚諭閣臣徐階曰朕東見火光此賊去京不遠其令兵部諭諸軍并力剿逐明日選以寇東遁聞爲將士所賞帝疑以問階對曰寇營尙在平谷選等往通州矣謂追殺者妄也帝銜之寇稍東大掠三河順義圍諸將傅津等於鄭官屯選遣副

潞城攷古錄卷下

十

將胡鎮偕總兵官孫臚遊擊趙溱擊之臚溱戰歿鎮力戰得脫寇留內地八日不退給事中李瑜遂劾選逮下詔獄明史紀事本末嘉靖四十年十月影克糾東西數萬騎潰牆子嶺而入大掠通州總督侍郎楊選逮論死方輿紀要牆子嶺在密雲縣東北古北口之東南嘉靖二十四年朵顏二十萬騎潰此而入大掠通州及順義三河諸縣四十二年俺答復由此入其東北爲磨刀峪嘉靖中嘗失守按紀事本末與史小異而年代尙同方輿紀要則年分全殊矣姑并載之以備參攷

明史穆宗本紀隆慶元年九月土蠻犯薊鎮詔宣大總督

王之誥還駐懷來巡撫都御史曹亨駐兵通州

明史徐貞明傳初貞明爲給事中上水利軍班二議事皆下所司兵部尙書譚綸言勾軍之制不可廢工部尙書郭朝賓則以水田勞民請俟異日事遂寢及貞明被謫至潞河終以前議可行乃著潞水客談以畢其說

明史王國光傳王國光拜南京刑部尙書未上改戶部再督倉場神宗卽位還理部事京軍支糧通州者候伺甚艱國光請遣部郎一人司之名坐糧廳投牒驗發無過三日諸軍便之

明史神宗本紀萬曆二十四年冬十月乙酉始命中官權

潞城攷古錄卷下

十一

稅通州是後各省皆設稅使

明史紀事本末萬曆二十八年七月稅監王虎劾通州同知邵光庭降調

明史紀事本末萬曆四十四年四月丙午雷火焚通州稅監張煜樓居御史金汝諧以聞請罷稅使不報

明史徐光啟傳由庶吉士歷贊善楊鎬四路喪師京師大震累疏請練兵自效神宗壯之擢少詹事兼河南道御史練兵通州列上十議時遼事方急不能如所請光啟疏爭乃稍給以民兵戎械

明史熹宗本紀天啟元年募兵於通州天津宣府大同

明史孫承宗傳忠賢逐楊漣趙南星高攀龍等承宗方西
巡薊昌念抗疏未必親覽往在講筵每奏對輒有入乃請
以賀聖壽入朝面奏機宜欲因是論其罪魏廣微聞之奔
告忠賢承宗擁兵數萬將清君側忠賢悸甚繞御牀哭帝
亦爲心動令三道飛騎止之承宗抵通州聞命而返忠賢
使人偵之一襍被置輿後車鹿善繼而已

明史紀事本末通州立懷仁祠者督漕內監李明道也通
州昌平二鎮立崇仁彰德二祠者總督閻鳴泰也

皆魏忠賢生祠

明史莊烈帝本紀崇禎二年召前大學士孫承宗爲兵部
尙書中極殿大學士視師通州

潞城攷古錄卷下

十三

明史孫承宗傳崇禎二年

大清兵入大安口取遵化將薄都城廷臣爭請召承宗詔
以原官兼兵部尙書守通州仍入朝陛見承宗至召對平
臺帝慰勞畢問方略承宗奏臣聞袁崇煥駐薊州滿桂駐
順義侯世祿駐三河此爲得策又聞尤世威回昌平世祿
駐通州似未合宜帝問卿欲守三河何意對曰守三河可
以阻西奔遏南下帝稱善曰若何爲朕保護京師承宗言
當緩急之際守陣人苦飢寒非萬全策請整器械厚犒勞
以固人心所條畫俱稱旨帝曰卿不須往通其爲朕總督
京城內外守禦事務仍叅帷幄趣首輔韓爌草敕下所司

鑄關防承宗出漏下二十刻矣卽周視都城五鼓而畢復出閱重城明日夜半忽傳旨守通州時烽火逼近郊承宗從二十七騎出東便門道亡其三疾馳抵通門者幾不納旣入城與保定巡撫解經傳御史方大任總兵楊國棟登陴固守

明史李邦華傳崇禎元年四月起工部右侍郎督理河道旋改兵部協理戎政明年春命加兵部尙書帝知邦華忠奏無不從邦華亦感帝知不顧後患其年十月畿輔被兵簡精卒三千守通州二千援薊州自督諸軍營城外軍容甚壯

潞城攷古錄卷下

明史官惟賢傳爲山海北路副總兵二年冬京師有警惟賢入衛總理馬世龍令急援寶坻溇縣

明史南居益傳崇禎元年起戶部右侍郎總督倉場畿輔戒嚴居益在通州爲城守計甚備

明史范景文傳擢兵部添註左侍郎練兵通州通鎮初設兵皆召募景文綜理有法軍特精嘗請有司實行一條鞭法徭役歸之官民稍助其費供應平買不立官價名帝令永著爲例居二年以父喪去官

劉澤清傳六年遷總兵九年京師戒嚴統兵入衛命駐新城爲南北控扼復命留守通州加左都督

明史紀事本末崇禎九年八月召廷臣於平臺初御史金光宸叅督師張鳳翼及鎮守通州兵部右侍郎仇維楨上怒曰仇維楨方至通州爾卽借題沽名議謫

明史紀事本末崇禎十一年通州有司不法上內訪逮入責撫按不先劾

明史馮師孔傳起懷來兵備副使移密雲削籍歸十五年詔舉邊才用薦起故官監通州軍勤王兵集都下剽劫公行割婦人首報功師孔大怒以其卒抵死

明史周延儒傳崇禎十六年四月

大清兵略山東還至近畿帝憂甚大學士吳甡方奉命辦

潞城攷古錄卷下

十四

流寇延儒不得已自請視師帝大喜降手敕獎以召虎裴度賜章服白金文綺上駟給金帛賞軍延儒駐通州不敢戰惟與幕下客飲酒娛樂而日騰章奏捷

廣輿記沈域灤縣知縣時北兵逼境域料理城守舉動安詳巡方董怪而問之曰斗大孤城何恃而不恐域從容拱手曰以身殉之城卒無恙

以上事蹟

續文獻通攷金中都東北都巡檢使一員正七品通州置司分管大興灤陰昌平通順義盈州界盜賊事

司吏一人掌行署文

書馬軍十五人於武衛馬軍內選少壯閑熟弓馬人充

至元十六年置通惠河運糧千戶所秩正五品掌漕運之事通州十三倉秩正七品

至元二十四年分立督漕運司於河西務掌御河上下至直沽河西務李二寺僱運糧斛各置運使二人正三品同知二人正四品副使二人正五品判官二人正六品又至正二年添設提調官運副運判各一人

通州甲匠提舉司隸軍器監

通州皮貨所大使副使各一員延祐六年置

隸工部

通州白河抽分竹木局織染所雜造局各大使一人副使一人

隸工部

潞城攷古錄卷下

五

張家灣檢校批驗所各大使一人副使一人

以上俱續通攷

以上設官

明史五行志洪熙元年六月驟雨白河溢正統三年通州白河溢萬曆四十一年通惠河決

洪武二十九年二月辛丑通州火燔屋千九百餘正統十年五月癸巳通州右衛倉火嘉靖元年二月己亥通州城樓火三十一年九月戊寅通州漕艘火三十五年四月丁酉通州西倉火四十三年閏八月辛亥通州糧艘火

成化元年八月通州大雨壞城及運倉宏治十年三月丁

卯北通州雨冰深一尺

以上俱五行志

明史紀事本末宏治二年六月京城及通州大雨水溢壞廬舍人多溺死

以上災異

元史世祖本紀至元二十六年五月發五衛親軍千人濬河西務至通州漕渠二十九年二月發通州河西務粟賑東安固安薊州寶坻縣饑民

明史食貨志宣德中增置北京及通州倉

正統十年設通濟庫於通州

灤縣諸鈔關量舟大小修廣而差其額謂之船料不稅其貨自南京至通州每船百料納鈔百貫

潞城攷古錄卷下

七

移灤縣鈔於河西務

景泰元年于謙柄國船料減至十五貫減張家灣課稅之半以上俱食貨志

以上漕運稅課

馬祖常石田集禮部尙書馬公神道碑祖常曾祖子十一人

諱世顯知通州事

曝書亭集遼陽劉氏其先傳自太保秉忠之後至正末有諱顯者仕爲通州安撫司副使洪武中授都指揮僉事封明威將軍子世襲

楊士奇北京紀行錄二十八日晴早過王家店五里舟人

以事阻晚始發夜宿板罾口二十九日晴早至蕭家林數日來河路屈曲舟中困臥悶悶食後便自蕭家林徒步問和合驛中道阻水褰裳涉葦荻中泥潦沒膝踰里所始得平地阜隸高謙從旁竊歎動不若靜余甚愧之亭午至和合驛飲商百戶舟中午後余舟至遂發三十日晴亭午至張家灣買舟

楊士奇南歸紀行錄正統四年二月十八日早奉天門陛辭上復諭速來士奇敬唯叩首退光祿寺奉旨賜酒飯經筵諸公不得餞送遂別延年學士偕同院諸公及鄉邑親交送出朝陽門建安公遣乃子錫攜酒送至東嶽廟送至

潞城攷古錄卷下

七

通州者梁叔車叔莊龍士郁孟嘉甥德敷姪昇姪稭子及鄰比數人時北風甚盛送者不堪余亦困未至通州五里都指揮劉斌來迓南京故人午至通津驛兩衛州官學師生皆

來見遂登舟叔車五人小酌舟中皆辭歸昇稭及家人鄰比留舟中送前子謨以其子穎附舟歸午阮內史來會小酌後家人及行李皆登馬船余與阮各乘驛船先行及至金菱灣迫暮馬船不至余兩人駐候之蓋馬船閣淺通津驛前也是日晴北風十九日余與阮仍駐金菱灣候馬船不至蓋冰凍初解流沙橫潰舟行未有常道也是日晴家人及鄰比送者皆歸其早日有左右抱珥相對二十日早陰馬船始至

金菱灣旣出灣又頻閣淺午遣辦事吏歸作寄二楊先生
別寄詩諸學士晚始至張家灣蓋自通州至此沿河閣淺
人力所濟皆劉都指揮及兩衛指揮趙玉楊青遞運所官
張聰之助聰吾舊辦事吏撥二遞運船分載行李晚微雪
遂霽趙指揮率人送往和合驛是夜宿李二寺廿一日早
陰行十餘里遇廬陵劉英寺丞略談鄉郡事見惠鷺二翼
食後遇李安御史微雪遂霽過灤縣過和合驛會會蒙啟
見惠長詩共小酌遂別驛丞南昌象牙潭人送炭夜至河
西驛宿是日晴雖十餘膠淺亦未若通州池下之艱澁也
三月初八日早行廿里郭誠員外過舟相訪郭提督河道

潞城攷古錄卷下

六

自儀真至呂梁初未相見河上官民皆譽之謂其廉公剛
正處事有條理但頗性急是日坐談頗久所論皆當北京
通州人也

晚至和合驛問民事同楊村麥下田半收高田旱無收張
珏郭智來候夜宿和合驛是日午陰晚晴南風初九日天
明發和合驛張珏郭智先歸午後至張家灣上馬頭河水
澁不能進遂止遣人齎關文詣通州官司索車及夫昇攜
家人來接二楊先生遣人攜酒殺見候是日晴初十日晴
劉斌都指揮及衛官來訪衛及州送腳力車遂遣昇導以
家人行李先歸土人云此地雖旱地下溼麥有收秋穀亦

好余因溼熱不敢登陸遂停舟俟早發秣以諸鄰來接蕭仲南之婿沈密以其子宗來見宗時授徒河上晚宗惠魚酌別田千戶仍宿上馬頭是日晴十一日早同阮內使舍舟登陸天明過通州阮先歸余至大王莊建安公遣子錫攜酒來迓二王錢曾四學士見候東嶽廟諸老鄰皆至鳳岐曰恭求樂見迓朝陽門外余入城遂詣鴻臚報名晚宿朝房雨涼十二日入見奉天門上同

抑菴後集羅亨信起拜山西道監察御史賜白金命往通州察倉庾之弊得老姦宿蠹若干人皆伏法

閩小紀武宗時閩僉憲林公文纘赴京謁補舟抵潞河適

潞城攷古錄卷下

十九

武宗巡幸至突入舫文纘伏船頭上鞭指之曰汝何從知隨入舟時家口咸匿艙下止一婢抱六歲兒立艙中上問曰此何人纘奏曰臣子上抱置膝曰相好當與朕爲子纘奏曰恐臣子無福上又指婢曰仍命此女抱攜之時扈蹕人至踉蹌促去兒入宮思父母日夜啼百計誘之終弗止文纘亦入都與素識大璫謀欲出兒璫乘機奏曰此兒誠福薄啼旣弗止不如舍之且收留乞養祖宗有禁上曰林某挽汝作說客耶如再啼當棄之水璫懼亟與文纘謀覓善泅者伏河側兒啼不止果棄之河中泅者故拉兒入水伺上回急出之兒僵矣文纘抱哭不已久之始甦文纘補

官嶺南亟攜兒去不久又休致歸杜門課子二十一歲舉於鄉又四年成進士名壁壁體父志終不附分宜官亦止僉憲

青谿漫稿陳公墓誌銘

諱達

榮祿大夫同知後軍都督府事

陳公奉命鎮守通州威德兼著盜賊屏迹居民安堵行旅晏然上下倚之爲重在鎮三十年如一日以老乞歸罷鎮七年成化乙巳二月卒於京師

智囊錢藻備兵密雲有二京軍劫人於通州獲之不服州以白藻二賊恃爲京軍出語無狀藻乃移甲於大門之外獨留乙鞫問數四聲色甚厲已而握筆作百許字若錄乙

潞城攷古錄卷下

三

口語狀遺去隨以甲入給之曰乙已吐實事由於汝乙當生汝當死矣甲不意其給也忿然曰乙本首事何委於我乃盡白乙首事狀藻出乙訟之遂論如法

香祖筆記明寶應孝廉陶成字雲湖朱升之大參妻父也以畫名家其行事怪僻甚嘗同升之赴會試距試期僅三日忽語升之曰聞張家灣某氏丁香花甚開子其從我遊乎升之不可成買小舟徑造其家痛飲花下五日乃去遂悞試期榜發升之中式比雲湖還鄉人醵錢賀升之雲湖於席上畫丁香一本尤妙絕洵曠達之士也

居易錄兵部職方司督捕主事康莊說馬誠所經綸御史

別業在通州城中東南隅近文昌閣瀕水曰蓮花菴今爲袁氏園亭

以上遺事

水經鮑邱水從塞外來南過漁陽縣東又南過潞縣西又南至雍奴縣北屈東入於海

水經注鮑邱水出禦夷北塞中南流逕九莊嶺東俗謂之大榆河又南逕鎮東南九十里西密雲戍西又南左合道人溪水大榆河又東南流白楊泉水注之又東南龍芻溪水注之大榆河又東南峽逕安州舊漁陽郡之滑鹽縣南左合縣之北溪水又南逕僂谿縣故城東鮑邱水又西南

潞城攷古錄卷下

三

逕獷平縣故城東鮑邱水逕漁陽郡治也秦始皇二十二年置鮑邱水又西南流公孫瓚旣害劉虞烏丸思劉氏之德迎其子和合眾十萬破瓚於是水之上斬首一萬鮑邱水又西南歷狐奴城東又西南流注之於沽河亂流而南鮑邱水入潞通得鮑邱之稱矣高粱水注之又南逕潞縣故城西王莽之通潞亭也漢光武遣吳漢耿弇等破銅馬五幡於潞東謂是縣也屈而東南流逕潞城南世祖拜彭寵爲漁陽太守治此寵叛光武遣遊擊將軍鄧隆伐之軍於是水之南光武策其必敗果爲寵所破遺壁故壘存焉水經注沽水出禦夷鎮西北九十里丹花嶺下東南流大

谷水注之又南出峽岸沽水又南左合乾谿水沽水又西南
南逕赤城東沽水又東南與鵲谷水合沽水又南漁水注
之又南與羸山之水合沽水又南逕安樂縣故城東晉書
地道記曰晉封劉禪爲公國俗謂之西潞水也沽水西南
流逕狐奴山西又南逕狐奴縣故城西沽水又南陽重溝
水注之沽水又南濕餘水注之沽水又南左會鮑邱水世
所謂東潞也沽水又南逕潞縣爲有潞名潞河也魏氏土
地記曰城西三十里有潞河也

以上水道

潞城攷古錄卷下終

潞城攷古錄卷下

三

